

Exxon a haya un candidato pa opera Transshipment

ORANJESTAD(AAN) -- Ministro Mansur ariba peticion di MEP, mester a presenta den sala di Parlamento pa duna un explicacion ariba e acuerdo cu Gobierno a firma cu Exxon.

MEP tabata tin diferente punto di vista ariba henter e negociacion cu Exxon entre otro cu durante henter e negociacion no tabata tin actanan ariba mesa.

Ministro Mansur a duna di conoce cu no tin actanan firma pa ambos partida. Segun Ministro Mansur, ora bo traha un acta di un reunion, pa esaki ta valido tur dos partida mester firma.

A keda acorda cu cada ken ta traha su actanan, sin bay door di tur e proceso di discusion pa haya un acta firma.

Loke si a tuma lugar durante e negociacion cu Exxon segun Ministro Mansur tabata e intercambio di "position papers"

caminda tanto Aruba como Exxon, Lago, tabata pone ariba papel kico nan kier.

A base di e sistema di intercambio di "position papers" a bin un acuerdo cu a worde incorpora den e acuerdo final.

Oposicion tambe a expresa cu Aruba lo sali financieramente perhudica cu e acuerdo aki.

Ministro Mansur a bisa cu e acuerdo cu Exxon ta hopi bon y ta na ventaha di Aruba.

Esaki ta encera cu Aruba ta haya facilidadnan ariba tereno di Lago por nada.

A cambio Gobierno a bisa cu cierto fundeshinan etc. por keda den tera, pasobra segun e gruponan tecnico, DOW y contratistanan grandi, esaki no ta stroba desaroyo di e tereno.

Pa loke ta trata oposicion su punto di vista cu Exxon lo sali liber di tur demanda den e negociacion, Ministro Mansur a bisa cu e protocol di 1985 a ab-

solve Exxon, Lago, di tur cos.

Segun Ministro Mansur, actualmente Gobierno a parti e negociacionnan cu Exxon den tres topico cu ta:

1. Desmantelacion di Lago, ariba cual unicamente a yega na un acuerdo

2. Seru Colorado

3. Demanda ambiental

Ministro Mansur a duna di conoce cu e discusionnan ariba Seru Colorado a tranca y te ainda no a cuminza papia ariba e demanda ambiental cu ta contene tur e demandanan grandi.

Ministro Mansur no ta compromete con oposicion por bisa cu Exxon a sali liber di tur cos.

Manera ta conoci, den e acuerdo di desmantelacion, Exxon a compromete su mes pa busca operadornan pa e transshipment ariba Sea Bird I y II.

Ministro Mansur a duna di conoce cu Exxon tin un candidato y cu nan a keda di infor-

ma Gobierno ken e candidato ta y ki areglo nan a yega cune.

Te ainda Gobierno no a ricibi

e detayenan, solamente a ricibi informacion cu Exxon a haya un candidato.